

S-United tabata e highlight di e anochi durante Hebbe Hebbe 2014

ORANJESTAD – Ayera nochi a tuma luga Rib'un Chill cu Hebbe Hebbe 2014. Un cantidad di persona a sa di yega na Postkantoor na Playa, caminda cu nan por a gosa y disfruta di e magno evento aki, cu practicamente ta duna un inicio di e final pa loke ta trata Carnaval 60. Highlight di e anochi tabata S-United, cu a reuni despues di 35 aña y solamente pa Carnaval 60. E ta wordo considera como e “original Soca Band” di Aruba. Ken no ta corda e banda aki den su gloria, en particular durante e Calypso y Roadmarch Contest cu e tempo ey tabata tuma luga den Lago Sport Park, awo conoci como Joe Laveist. Publico presente por a corda cancionnan manera “Road on Fire”, cu sigur ai-



nda ta dal duro duro y no tin ningun otro pa igual'e. Fuera di S-United, tambe tabata tin Academy Brass, kendenan a reuni solamente pa Carnaval 60 tambe.

Tin cu bisa cu e 6 decadanan di Carnaval a haci cu varios banda y grupo a sa di reuni pa un solo biaha pa asina celebra Carnaval 60 y recorda e epocanan di gloria cu Aruba a pasa aden pa loke ta e celebracion aki.

Homenahe

Durante e celebracion di Hebbe Hebbe, tabata tin homenahe special na dos Carnavalista cu a contribui pa añanan largo y cu ta hopi conoci den nos comunidad. Nan ta den persona di Roberto “Boedoem” Brown y

Benny Vrolijk, kende ta fundado di e banda Grasshopper. Varios personahe conoci a yega di milita den Grasshopper den añanan pasa, cu awendia ya no ta toca mas.

Ceramento di un gran evento

Por bisa den liñanan grandi cu evento aki tabata un éxito rotundo. E publico por a disfruta di un tremendo actividad cu participacion di bandanan manera Youth Extreme, cu a celebra 10 aña di existencia, The Failures y Dushii Band.

Presencia di polis

Por a ripara durante e evento aki presencia di polis. Automaticamente nan a keda



alerta pa cualkier eventualidad cu por a pasa durante e celebracion aki. Nos reporteronan na e sitio a informa BON DIA ARUBA, na ciere di nos edicion, mirando e aglomeration di hende cu tabata tin riba parkinglot di Postkantoor, polis tabata sta-

cion tanto paden como pafo di e evento pa mantene e control y ordo.

Faya Bo Haya ta na vigor y polis no ta tolera ningun delito ni infraccion cu wordo cometi. Tin cu bisa te cu asina leu, no tabata tin ningun incidente. □